

AMALAN KHURAFAT DAN AZIMAT



ENAKMEN MUFTI DAN FATWA (KEDAH DARUL AMAN) 2008
PEMBERITAHUAN FATWA DI BAWAH SEKSYEN 23 DAN 24

AMALAN KHURAFAT DAN AZIMAT

Pada menjalankan kuasa yang diberikan oleh Subseksyen 23(3) dan 24(4), Enakmen Mufti dan Fatwa (Kedah Darul Aman) 2008 Jawatankuasa Fatwa dan atas titah perintah Kebawah Duli Yang Maha Mulia Sultan Negeri Kedah Darul Aman dengan ini menyiarkan fatwa seperti dinyatakan dalam Jadual.

JADUAL

Berdasarkan keputusan Mesyuarat Jawatankuasa Fatwa Negeri Kedah Darul Aman yang bersidang pada 13 Disember 2020, inilah diputuskan fatwa untuk diguna pakai di Negeri Kedah Darul Aman seperti berikut:

1. Khurafat ialah semua cerita atau rekaan atau khayalan, ajaran-ajaran, pantang larang, adat istiadat, ramalan-ramalan, pemujaan atau kepercayaan yang menyimpang daripada ajaran Islam. Khurafat juga merangkumi cerita dan perbuatan yang direka dan bersifat karut atau dusta. (Kamus Dewan Edisi ke Empat, halaman 784)

Kepercayaan dan perbuatan karut yang dianggap mempunyai hubungan dengan agama Islam sedangkan pada hakikatnya bertentangan dengan konsep tauhid dan syariat juga termasuk dalam amalan khurafat. (Garis Panduan Khurafat dan Azimat, Muzakarah JK Fatwa MKI Kali ke 40, 9 Ogos 1996, halaman 78.

2. Azimat ialah satu bentuk permohonan untuk mendapatkan pertolongan atau bantuan bagi manfaat diri sendiri atau untuk memudaratkan orang lain dengan menggunakan objek-objek dan ayat-ayat tertentu yang dianggap mempunyai kesaktian dan kuasa ghaib yang melampaui kekuatan semula jadi apabila dijampi atau dipuja.
3. Islam sangat menitikberatkan soal akidah dan syariat. Segala amalan dan kepercayaan yang tidak berdasarkan kepada sumber-sumber yang asal seperti Al-Quran, Hadith, Ijmak dan Qias adalah ditolak oleh Islam.
4. Amalan memuja dan memohon pertolongan darinya seperti yang selalu dilakukan oleh sesetengah bomoh dan dukun adalah syirik dan menyesatkan orang-orang yang bersahabat dan menggunakan jin dan tukang sihir dan tukang tenung adalah tergolong dalam golongan orang-orang yang bodoh dan menzalimi diri sendiri.
5. Amalan penggunaan azimat atau tangkal sebagai pelindung diri seperti ilmu kebal, ilmu pengasih, ilmu pelemah hati, ilmu penjauh jin dan sebagainya yang dicampuradukkan dengan sihir adalah syirik dan menyeleweng dari ajaran Islam.

[(73) dlm.JMNK(F)603 Jld. 2; PUN(KD) 600-1/5/3(4)]

Tarikh Warta : 1 April 2021

Tarikh Keputusan : 13 Disember 2020